

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 73 (1988)

Heft: 29

Artikel: Cronica

Autor: Cathomen, Ignaz

DOI: <https://doi.org/10.5169/seals-881693>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Cronica

Zercladur 1987

– **Votaziuns cantunala dils 14 da zercladur 1987.** Ils votants dil Grischun han giu da prender posiziun viers buca meins che 5 projects da votaziun. Malgrad ch'entgins projects ein stai da gronda impurtonza ei la participaziun stada fetg magra cun mo 16 pertschien dils votants. Ils resultats:

1. Cumpletaziun dalla constituziun cantunala (protecziun digl ambient e fatgs d'energia) Gie 13 503 Na 3 413
2. Lescha d'energia Gie 13 276 Na 3 930
3. Revisiun parziale della lescha davart supplements da famiglia per luvrers Gie 13 565 Na 3 940
4. Credit da ca. 31 milliuns per midar, sanar e renovar la clinica psichiatrica Waldhaus Gie 15 024 Na 2 822
5. Participaziun dil Grischun al concordat davart l'execuziun da sentenzias civilas Gie 12 375 Na 3 697

– **Radunanza da delegai dalla Ligia Romontscha a Samedan.** Quella radunanza che ha giu liug sonda, ils 13 da zercladur 1987 en la Chesa Planta a Samedan, ei stada caracterisada da mudesta participaziun e d'unanimitat en quasi tuttas damondas. Il quen concluda cun in avanzament da 93 000 francs. Las duas moziuns, inoltradas dall'Uniun dals Grischs, ein vegnidas decididas tenor la proposta dalla suprastanza: ina ei vegnida approbada parzialmein, l'autra ei vegnida refusada (mira rapports en GR nr. 47/16-6-1987 e LCP nr. 25/19-6-1987).

– **Radunanza generala dalla CRR a Samedan,** sonda ils 3-6-1987. La radunanza generala dalla CRR ei sesplegada senza fierer grondas undas sut il tgamun spe-ditiv da **dr. Fidel Caviezel**. Il punct culminont ei stau la surdada dil premi da radio e televisiun. Quel ei vegnius surdaus a **dr. Mena Wüthrich-Grisch** ed a **Ludwig Morell** en undrientscha da lur merets per lingua e cultura romontscha (mira rapport CP nr. 25/19-6-87).

– **Tir cantunal grischun en Surselva.** Dils 12 tochen ils 28 da zercladur 1987 ha giu liug en Surselva la XIXavla fiasta da tir cantunala. Quella ei sesplegada per l'em-prema gada a moda decentralisada sin plirs stans da sittar da Laax tochen en Val Tujetsch. Il comite d'organisaziun cun **Raimund Schmid**, Danis, alla testa ha pre-stau lavur exemplarica. Ils tiradurs ein mintgacass stai incantai dallas relaziuns da sittar; la participaziun ei stada fetg gronda ed ils resultats excellents (mira rap-ports e rapportaschas en la pressa grischuna dils meins zercladur e fenadur).

– **Messa nuviala a Domat.** Las primizias ein daventadas in eveniment scart per la Sur- e Sutselva. La pleiv da Domat ha suenter 20 onns puspei saviu festivar ina primizia dumengia, ils 14 da zercladur. Al primiziant, **Edgar Brunner**, vegn ei buc a muncar in post da lavur, ein gie numerusas pleivs digl uestgiu vacantas e spe-tgan sin in spiritual.

– Ils 4 da zercladur ha in grond diember da musicants accumpaignau **Oscar Tschuor**, Rueun/Cuera, al davos ruaus sil santeri dalla catedrala da Cuera. Il tra-

passau ei daventaus enconuschents en l'entira Svizra sco valent musicist, dirigen e surtut sco cumponist da biaras ovras per la musica instrumentala. Zaconts da ses marschs ein daventai fetg populars. Als musicants grischuns vegn el a restar en buna memoria.

– **Dr. Luregn Mathias Cavelty** daventa il successur da Jakob Schutz sco president dall'Uniun da traffic dil Grischun. Per l'emprema gada vegn quell'impurtonta uniun economica tgamunada d'in Sursilvan (rapport dalla radunanza generala dall'UTG mira GR nr. 50/26-6-1987).

– **Concurrenza da cumposiziuns 1986/87.** La concurrenza per cumposiziuns romontschas per chors ha giu in grond success. Igl ei vegniu inoltrau 18 canzuns per chor mischedau, medemamein 18 per chor viril, 6 per chor d'affons e da dunnas e 3 canzuns per solos. La rangaziun muossa il suandont resultat:

Las 6 canzuns selecziunadas per chor mischedau ein:

- | | |
|----------------------------------|-------------------------|
| 1. Terra | Janett C./Klainguti J. |
| 2. Clom da pasch I | Simeon U./Poltera R. |
| 3. Maletg dalla nateira | Peron J./Cadotsch P. |
| 4. Curasch | Thöni G.P./Spegnas G.N. |
| 5. T'impacha pür d'la sort cumün | Peron J./Gaudenz G. |
| 6. Vischnanca murenta | Valär M./Sonder A. |

Las 6 canzuns selecziunadas per chor viril ein:

- | | |
|--------------------|--------------------------|
| 1. El mund dad oz | Lombriser E./Capeder D. |
| 2. Panzieris | Muoth A./Muoth S.A. |
| 3. Clom da pasch I | Simeon G.D./Poltera R. |
| 4. Oz | Muoth A./Muoth S.A. |
| 5. Nies temps I | Muoth A./Durschei V. |
| 6. Il tschiel blau | Lombriser E./Durschei V. |

Las 2 canzuns selecziunadas per chor d'affons e dunnas ein:

- | | |
|---------------------|-----------------------------|
| 1. La plonta sevila | Lombriser E./Giger C. |
| 2. Furtüna | Roth A./Brunold-Claglüna G. |

La canzun selecziunada per solos:

- | | |
|----------------|--------------------|
| Natüra intacta | Roth A./Stecher B. |
|----------------|--------------------|

– **Grond success dallas musicas sursilvanas** alla fiasta da musica cantunala a S. Murezi, sonda/dumengia, ils 27/28 da zercladur.

1. classa:	2. classa:		
Landquart	116.5 puncts	Cazas	116 puncts
Mustér	109 puncts	Vaz-su	116 puncts
Favugn	108 puncts	Trun	115.5 puncts
3. Classa:	4. classa:		
Cuera, giuvenils	113.5 puncts	Falera	118.5 puncts
Glion	113 puncts	Rabius	118 puncts
Lumbrein	113 puncts	Val s. Pieder	117.5 puncts
		Andiast	115 puncts
		Uors-Suraua	114 puncts

Fenadur 1987

- **La viafier Furca-Alpsu** concluda il quen da menaschi per 1986 cun in gudogn. Per l'emprema gada en sia historia ei quei il cass. Las entradas da menaschi muntan a 26,2 milliuns francs e las expensas a 25,2 milliuns, aschia ch'ei sersulta in gudogn dad 1 milliun francs.
- **Grondas malauras e donns enorms en Surselva ed en Val Puschlav.** Sonda, ils 18 da fenadur han draccas stendidas caschunau donns immens el cantun Grischun. Flums ed uals ein carschi anetgamein, han inundau e devastau vitgs e cultura ed interrutt las vias da traffic. La lingia dalla Viafier retica ei vegnida disfatga dallas auas furibundas dil Rein sin plirs kilometers denter la Punt e Mustér. Gronds donns ein vegni caschunai tras ils torrents sfrenai a Rabius, a Tavanasa vid ils implorts electrici ed en Val Medel. La Val Puschlav ei stada serrada pil traffic duront ca. in'jamna. Grondas inundaziuns hai dau il medem mument en Valtlina, nua che bovas han devastau plirs vitgets e caschunau unfrendas da carstgauns. Ina gronda part dalla planira valtlinesa ei stada jamnas sut l'aua (mira rapporti e reportaschas en la pressa grischuna da quels dis).
- **18avel cuors da romontsch dalla Fundaziun Retoromana a Laax.** Il cuors tradizional ha entschiet sonda, ils 18 da fenadur cun 44 participants. Pader Flurin ha dau l'entschatta cul referat introductiv «Vul ti enzatgi sco amitg, empren siu lungatg».
- **Jamna da cant e musica a Breil.** Dapi tschun onns vegn quell'jamna da cant e musica arranschada a Breil sut la direcziun dad Armin Caduff ed Erich Widl. Rodund 60 cantaduras e cantadurs han priu part. Ils participants han concludiu lur lavur musicala cun in concert a Breil ed a Flem Casa d'uaul.
- **Grev accident d'in auto da posta en Stussavgia.** Gliendisdis, ils 27 da fenadur disviescha in auto da posta sin viadi a Tenna, vulend cruschar cun in auto privat parcaus en via. Treis dils 17 passagiers vegnan blessai grevamein, ils auters pli levamein. Ina donna turitgesa da 43 onns miera sin viadi el spital. Ils vulnerai vegnan transportai per helicopter els spitals da Glion, Tusaun e Cuera.
- **Gruppa da lavur per promover ils lungatgs.** La Regenza grischuna ha nominau ina gruppa da lavur che duei elavurar ideas e mesiras concretas per la promozion dils lungatgs, resp. per ina legislaziun corrispondenta per nies cantun. Da quella gruppa fan part: Toni Cantieni, pres. della LR, dr. Bernard Cathomas, secretari della LR, Gion Tscharner, scolast da scola media Zernez, Guido Crameri, president della PGI, dr. Massimo Lardi, vicepres. della PGI, dr. Georg Jäger, pres. dall'Uniun dils Gualsers, Anna-Lydia Florin-Wehrli, Uniun dils Gualsers sco era dr. Paul Meinherz e deputau Pierluigi Schaad sco representants dil Grischun buca organisaus linguisticamein.
- En Lumnezia ei vegniu fundau ina nova societat «**Sutgeras Lumnezia SA**». Quella societat vul construir novs mieds da transport turistics en la regiun da Vignogn viers il péz Sezner (mira informaziun pli detagliada GR nr. 61/4-8-1987).

Uost 1987

– **Cusseglier federal Leon Schlumpf seretrai.** Suenter haver fatg part 8 onns dil Cussegl federal seretrai Leon Schlumpf tut surura sco cusseglier federal. La supresa ei gronda el Grischun ed en l'entira Svizra (mira commentaris en la pressa grischuna).

– **Il pli grond indrez solar el Grischun secatta a Vuorz.** Dapi entgins onns sestenta ins dapertut da substituir igl ieli da scaldar cun energias nunnuscheivlas. A Vuorz obtegn il niev hotel Ucliva in indrez da scaldar che sebas sin l'utilisaziun da lenna e dall'energia solara. Cun agid da collecturs d'ina surfatscha totala da 96 m² vegn ei produciu ca. 46 000–50 000 kWh (mira indicaziuns detagliadas GR nr. 66 e CP nr. 34 dils 21-8-1987).

– **L'aua magica, in niev musical dad Armin Caduff.** L'aua termala da Val s. Pieder, dapi tschentaners enconuschenta sco bien remedii encounter diversas mangognas e dapi gleiti vegn onns enconuschenta sco aua minerala sut il num «Aua da Val» ha inspirau Armin Caduff da scriver in musical. Quel ei vegnius presentaus ina ro-scha gadas el decuors dalla stad ed atun 1987 el hotel Therme a Val s. Pieder e quei cun grond success.

– **Ina serenera per las vischnauncas da Surcuolm e Sursaissa.** Ils 22 d'uost han las vischnauncas da Surcuolm e Sursaissa saviu inaugurar quei project cumineivel a Valata. A quella serenera ein colligiai: Surcuolm, Valata, Miraniglia, Misannenga, Vivèr e Larghera. Egl ual van aunc las deflussiuns da Cuort, Zwischen-tobel ed Innertobel.

– **Sviada d'in tren denter Versomi e Valendau.** Gliendissidis, ils 24 d'uost ei in tren dalla Vifacier retica sviaus dil binari pervia d'in sbuadetsch che veva cuvretg la lin-gia. La locomotiva e treis carrs ein cupitgai dalla spunda giu. Essend ils emprems treis carrs vids ha ei dau negins blessai. Il donn material ei denton considerabels (mira GR. nr. 68/28-8-1987).

– **Reavertura della scola suenter 13 onns a Duin.** Varga 40 vitgs muntagnards han oz neginas scolas pli en consequenza dalla depopulaziun permanenta. Ton pli gronda ei stada la legria a Duin ils 31 d'uost, savend arver da niev la scola pri-mara, e quei cun 6 scolars. Pils proxims onns duess la scola esser segirada damai che 4 scolarets frequentan la scoletta.

– **Il tir cantunal grischun** ei vegnius concludius ufficialmein sonda, ils 29 d'uost. 8639 tiradurs han fatg part da quel e quels han tratg buca meins che 654 451 siets duront las treis jamnas da concurrenza. Per biars Sursilvans ei il tir cantunal staus igl eveniment principal dalla stad 1987 (rangaziuns mira GR nr. 70/4-9-1987).

Settember 1987

– **Canorta romontscha a Flem.** Dapi gleiti dus onns serimnan ils Romontschs da Flem reguladamein igl emprem gliendissidis dil meins ad ina canorta romontscha.

Il comite responsabel vul slargar l'offerta pils romontschs da Flem cun organizar treis gadas ad onn ina sera culturala cun referats e discussiuns. Gliendisidis, ils 7 da settember ha l'emprema da quellas sentupadas giu liug. **Pader Flurin Maissen** ha referiu davart il tema: Cultura e cultira (mira CP nr. 37/11-9-1987).

- **Ils bibliotecaris svizzers a Mustér.** Dils 10–12 da settember han ils bibliotecaris svizzers salvau lur dieta annuala a Mustér. Rodund 300 bibliotecaris sco era hosps dalla Svizra e digl exterior han priu part da quella dieta ch'ei sesplegada el center sportiv Acla da Fontauna (mira GR nr. 73/15-9-1987).
- **Fiera e fiasta a Glion.** A dretgas uras sin l'emprema fiera da settember va la construcziun dalla halla da fiera a Glion a fin. Per segidar cun l'Uniun purila sur-silvana a finanziar quei stabiliment ha l'Uniun da mistregn e commerci da Glion e contuorn arranschau ina gronda fiasta populara cun diversas acziuns ed in grond til folcloristic. In pievelun ha dau suatientscha agl invit da far fiasta (mira rapportaschas en la GR nr. 73/15-9-1987 ed en la CP nr. 38/18-9-1987).
- **In eveniment da televisiun en Surselva.** Per l'emprema gada vegn ina emissiun divertenta da muntada naziunala, il «Suppertreffer» cun Kurt Felix sco presenter, emessa directamein dalla Surselva anora, numnadamein dil center da sport Prau la Selva a Flem, e quei sonda, ils 19 da settember. L'emissiun sco tala ei reussida cumpleinamein e numerus Sursilvans han persequitau la registraziun directa a Prau la Selva. Concernent la qualitat dall'emissiun numnada van ils meinis pulitamein in ord gl'auter.

October 1987

- **Il Chor mischedau Surselva representa la quarta Svizra.** A caschun dalla scuntrada «CH . . . 4 vuschs» ha il chor mischedau dalla Surselva representau ils 3 e 4 d'october la Romontschia ad Estavayer-le-Lac. Sut la direcziun da **Claudio Simonet** ha il chor cantau canzuns da Gion Antoni Derungs, Gion Giusep Derungs, Duri Salm, Curò Mani e Lienard Biert.
- **Niev edifeci communal a Rueun.** Dumengia, ils 11 d'october ha la vischnaunca da Rueun saviu inaugurar in niev edifeci communal cun ina halla polivalenta, locals da scola ed ulteriuras localitads necessarias per la vischnaunca e per las uniuns dil vitg. Dapi onns han ils da Rueun spitgau vess sin quei di. Capeivel ch'igl entir vitg ha festivau l'inauguraziun dil bi edifeci ch'ei vegnius construius tenor ils plans digl architect H.P. Menn, Cuera (mira rapportascha GR nr. 81/13-10-1987).
- **Elecziuns dil Cussegl naziunal per la perioda d'uffeci 1987–1991.** Aunc mai ein tontas candidatas e tons candidats sestentai per in post el Cussegl naziunal sco quei ei stau uonn il cass. Buca meins che 32 dels, 9 dunnas e 23 umens han vuliu gudignar la quida dils electurs. Ils resultats dallas elecziuns da dumengia, ils 18 d'october 1987:

Vuschs da partida:

– christiandemocratica	61 806 vuschs
– partida populara	43 409 vuschs
– socialdemocratica	42 469 vuschs
– liberaldemocratica	39 647 vuschs
– giesta libra burgheisa	13 942 vuschs
– autunna verde	13 147 vuschs
– ecologica liberala	2 793 vuschs

Eligi ein:

Martin Bundi, psd, (vegl) cun	20 677 vuschs
Dumeni Columberg, pcd (vegl) cun	18 011 vuschs
Simon Bühler, pps (vegl) cun	14 276 vuschs
Peter Aliesch, pld (vegl) cun	12 907 vuschs
Theo Portmann, pcd (niev) cun	11 777 vuschs

– **Sentupada denter las culturas a Mustér.** Dils 23–28 d'october s'entaupan a Mu-stér scolasts dils quater lungatgs naziunals da nossa tiara sut il motto: «Ils brats scolastics – ina scuverta humana». Duront quels dis han ils magisters dallas differentas gruppas linguisticas vuliu emprender d'enconuscher in'autra part da nossa patria, quella gada la romontscha. Ils ca. 100 participonts ein sefatschentai cun la pratica da contacts interculturals, han contactau la populaziun indigena e luvrau concentradamein en ateliers. A caschun dalla dieta finala han els giu caschun da tedlar in referat da nies convischin prof. dr. Iso Camartin (mira GR nr. 85/27-10-1987).

– **Concurrenza per Asterix ed Obelix.** Venderdis, ils 23 d'october ei vegniu presentau a Cuera la pli novissima ediziun dalla Ligia romontscha: La «Historia dils Romontschs» en comics. **Dr. Felix Giger** ha procurau il text, **dr. Alexi Decurtins** ei staus cussegliader en fatgs d'istoria ed archeologia e **Peter Haas**, pictur artist da Domat ha procurau las illustraziuns cun ina gruppa da dessignaders. Igl ei vegniu creau ina ediziun tudestga da 15 000 exemplars, ina en sursilvan (2500 exemplars), en vallader (1500 exemplars), ed en surmiran e puter da mintgamai 500 exemplars. Ha quei comics la tratga spetgada (quei para dad esser il cass, dalla ediziun sursilvana ein 2000 exemplars gia vendi da miez november) vegn l'ovra cuntuada. Previ ein aunc 7 toms (mira rapport en la GR nr. 85/27-10-1987 e CP nr. 44/30-10-1987).

– **Center communal «Tgasa Lucmagn» a Curaglia.** Dumengia, ils 25 d'october ha era la vischnaunca da Medel inauguru in niev center communal. Il stupent ba-ghetg ei vegnius embellius d'ina biala pictura murala da Linus Flepp (mira GR nr. 84 ed 85/23 e 30-10-1987).

– **Ingrondiù igl arcun da tradiziun a Vuorz.** Dapi biars onns posseda la visch-naunca da Vuorz in museum local. La davosa dumengia d'october ha la popula-zion da Vuorz saviu prender envesta digl engrondiment da lur stupent arcun da tradiziun (mira rapportascha en la CP nr. 44/30-10-1987).

– **Landis e Gyr a Mustér siara sias portas.** Avon ca. 25 onns eis ei reussiu da per-schuader l'enconuschenta firma svizra «Landis e Gyr» a Zug da fundar ina filiala a

Mustér. La fatschenta ei sesviluppada stupent ed occupescha momentanamein ca. 80 persunas. Ton pli gronda ei la surpresa stada, cu ei ha giu num che la Landis e Gyr stoppi desister da sia filiala en Surselva per motivs da restructuraziun da menaschi. La trumpada ei gronda e las autoritads communalas e cantunalas vulan far tuts sforzs per mantener ils posts da lavur en la regiun cun encuir ina nova firma che surprendess luvrers e localitads per ina nova sparta da producziun (mira reacziuns en GR nr. 86/30-10-1987).

November 1987

- **450 sinoda evangelica retica a Pitasch.** La pintga pleiv reformada ch'appartegn geograficamein alla Lumnezia ha festivau la dumengia dalla reformaziun, igl 1. da november 1987, en ina fuorma pli festiva. El center dalla festivitat ecclesiastica e profana ei staus il referat da cusseglier naziunal **dr. Martin Bundi** davart il tema: Independenza e reformaziun a Riein, Pitasch e Duin 1487–1526 (mira rapport CP nr. 45/6-11-1987).
- **Refundau la partida cristiansociala dil Grischun.** Sonda, ils 7 da november, ein biebein 30 exponents dall'ala cristiansociala dalla partida cristiandemocratica se radunai en la Tschalaria a Cuera per refundar la partida cristiansociala sco quei che quella ha existiu da 1936 tochen 1970. La nova gruppazion politica duei mantener ils stretgs contacts cun la pcd cun daventar ina secziun da quella sco la gruppa dils giuvens cristiandemocrats e la gruppa da dunnas dalla pcd. La nova gruppazion vegn tgamunada da **Gion Bundi**, scolast alla scola professiunala a Cuera. Dalla suprastonza fan part: Gion Federspiel, Domat, Beat Deplazes, Rabiis, dr. Plinio Pianta Brusio ed Anna van Bevern-Prinz, Domat (mira rapports e commentaris en la pressa grischuna dils 9–13 d'october 1987).
- **Economia e cultura en Lumnezia.** Ils 13 da november han l'Uniun da mistergers e professiunists dalla Lumnezia-su e la Romania arranschau da cuminsonza ina sera d'orientaziun e discussiun davart il tema «Economia e cultura». La radunanza bein frequentada e caracterisada d'ina viva discussiun ei vegnida tgamu nuda da **Martin Cabalzar** sco meinadiscussiun (mira rapports en la CP nr. 46/13-11-1987 e GR nr. 91/17-11-1987).
- **Tujetsch impunda 72 000 francs per la cumpra da cristallas.** El decuors digl atun han cavacristallas austriacs scuvretg in fuorn da cristallas tut aparti en Val Nalps. Per impedir che l'entira scoperta mondi egl exterior conceda il cussegl da visch naunca in credit da 72 000 francs per la cumpra dils pli bials tocs da quella scuvretga.
- **Radunanza da delegai dalla Romania a Razén.** La radunanza ha giu liug sonda, ils 28 da november 1987 allas 14.00 en sala da scola. In tschec diember da delegadas e delegai han dau suatientscha agl invit dalla suprastonza. Il chor baselgia sut la direcziun da **Toni Muoth** ha beneventau ils presents cun entginas stupentas canzuns. Il president communal **Lorenz Tschalèr** presenta sia visch naunca en viarva sutsilvana da Razén. Las tractandas ein beingleiti stadas deliberadas. L'in strucziun da romontsch en visch nauncas fermamein germanisadas ha effectuau liunga discussiun (mira rapport en GR nr. 95/1-12-1987).

– **Il matsch grischun da tir** vegn gudignaus dil sursilvan **Erwin Vincenz** da Laax. El gudogna il matsch cun 1370 puncts avon Jann Adank cun 1369 puncts e Niklaus Wilhelm cun 1341 puncts.

– **Ina nova messa romontscha per chor viril.** Da cuort ei cumparida ina nova messa romontscha per chor viril, la «Messa da speranza», ina cumposiziun dil giuven cumponist da Razén, **Alvin Muoth** tenor in text da **Dumeni Capeder**.

December 1987

– **Votaziuns federalas e cantunala dils 6 da december 1987.** Ils votants han giu da prender posizion viers 5 projects da votaziun, 3 federais e 2 cantunals.

Ils projects federais:

1. Viafier 2000

Acceptau el Grischun cun 30 509 gie encunter 13 604 na
(Svizra: 1 140 269 gie encunter 861 036 na)

2. Assicuranza da malsauns e da maternitad

Refusau el Grischun cun 11 483 gie encunter 32 578 na
(Svizra: 571 338 gie encunter 1 417 610 na)

3. Iniziativa per la protecziun dallas palius da Rothenthurm

Acceptada el Grischun cun 23 595 gie encunter 20 102 na
(Svizra: 1 153 475 gie encunter 839 925 na)

Ils projects cantunals:

1. Revisiun dalla constituziun cantunala (augment dil diember da commembers dalla cumissiun d'educaziun e dalla cumissiun da sanitad sco era midada dalla competenza per l'elecziun)

Acceptada cun 20 674 gie encunter 17 800 na

2. Revisiun parziale dalla lescha davart la planisaziun dil territori pil cantun Grischun

Acceptada cun 25 270 gie encunter 13 082 na

– **La fabrica da ponn a Trun sut in niev manaschament.** Dils 12 da december na-
ven vegn la fabrica da ponn à Trun manischada da dus novs acziunaris principals,
numnadamein dalla Model SA, Weinfelden, ina firma ferma sil sectur dalla pro-
ducziun da pupi e cartun, e dall'ovra electrica sursilvana (OES), Glion. Il cantun
Grischun, la vischnaunca da Trun e la Nandro SA restan vinavon acziunaris dalla
intepresa. Detagls dalla sanazion e dil niev concept da producziun mira el rap-
port en la GR nr. 99/15-12-1987.

– **La radunanza da delegai dalla Ligia Romontscha** dils 12 da december a Cuera
ei stada ell'enzenna dalla Scuntrada romontscha 1988 a Scuol. Las preparativas
per commemorar ils 50 onns romontsch sco lungatg naziunal ein s'avanzadas
fetg. Il preventiv ed il program da lavur per 1988 vegnan sancziunai. Detagls dalla
radunanza mira rapport GR nr. 99/15-12-1987 e CP nr. 51/18-12-1987.

– **Exposiziun da maletgs el hotel Rezia a Glion.** En la sala restaurada da niev ex-
pona il pictur artist **Robert Cavegn** sias ovras malegiadas davos veider. La vernis-
sascha ha giu liug venderdis ils 11 da december. L'exposiziun ha cuzzau tochen
ils 26 da december.

- El center sportiv Prau la Selva, Flem, expona **Stiafen Caduff** ina retscha da maletgs en la tecnica d'acril, tusch e flies. La vernissascha ha giu liug sonda, ils 12-12-87. L'exposiziun ei stada accessibla duront in meins.
- El Café Spescha a Glion expona **Martin Mathiuet** ses maletgs ed entagls. Martin Mathiuet ei gia dapi ina roscha d'onns enconuschents sco pictur, entagliader ed illustrader da cudischs romontschs.
- **Il renomau cineast Daniel Schmid**, seprenta a Glion. A caschun dalla presen-taziun da siu davos film «Gieri Genatsch» ha la cumissiun da cultura dil marcau da Glion envidau il regissur dil film Daniel Schmid, oriunds da Flem, per che quel sappi sez dar plaid e fatg al publicum interessau davart sia laver sco cineast e specialmein concernent siu davos opus «Gieri Genatsch» (mira GR nr. 100/ 18-12-1987).
- **Gion Deplazes** alla scuntrada e formaziun Surselva. En connex cun il program da scolaziun da carschi han ins era offeriu il cuors «Romontsch per Romontschs» cul tema special: Scriver rapports e raquens cun exercezis da stilistica ed ortogra-fia. Ina sera ha Gion Deplazes delectau ils participonts al cuors ed auters interes-sents cun la prelecziun d'ina historia cuorta. L'occurrenza ha giu liug a Danis.
- La giuvna **Cornelia Vincenz** d'Andiast astga alla fin digl onn 1987 mirar anavos sin in onn da plein success. Sco emprema dunna el Grischun contonscha ella il di-iplom sco dirigenta el scalem superiur dall'associaziun da musica dalla Svizra, e quei cun la nota maximala. Cornelia Vincenz diregia la societad da musica da Fa-lera ed ei scolasta da musica tier la scola da musica dalla Surselva.